

दिनांक 07.12.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी काले लोकसभा मांय वंदे मातरम् री डेढ़ सौवीं वर्षगांठ माथे चर्चा री सरुआत करेला।
- मुख्यमंत्री भजनलाल शर्मा प्रवासी राजस्थानियों सूं विकसित राजस्थान बणावण मांय सक्रिय भागीदारी रो हेलो कर्यो।
- मध्यप्रदेश रा पेंच टाइगर रिजर्व सूं बूंदी रा रामगढ़ टाइगर रिजर्व मांय बाधिन लाई जावेली-लोकसभा अध्यक्ष ओम बिरला कह्यो इण सूं पर्यटन ने बधावो मिलेला।

अर

- सरकार विमानन कम्पनी इण्डिगो ने रद्द या बाधित उड़ानां रो सगळो पेंडिंग रिफण्ड तुरंत जारी करणे रो कह्यो-रेलवे यात्रियां री सुविधा खातिर बेसी रेलगाडियां री व्यवस्था करी।

000

राष्ट्रीय गीत वंदे मातरम री डेढ़ सौवीं वर्षगांठ माथे काले लोकसभा मांय खास चर्चा व्हेला। आधिकारिक सूत्रां रे मुजब, प्रधानमंत्री नरेन्द्र मोदी लोकसभा मांय इण चर्चा री सरुआत करेला। लारला सप्ताह इण बारां मांय जाणकारी देवता थकां संसदीय कार्य मंत्री किरिन रिजिजू बतायो हो के पूरे दिन री चर्चा दोपहरां 12 बज्यां सरु व्हेला। वणां बतायो के लोकसभा अध्यक्ष ओम बिरला री अध्यक्षता मांय व्ही सर्वदलीय बैठक मांय ओ फ़ैसलो लियो ग्यो कि 8 दिसंबर ने वंदे मातरम माथे चर्चा अर 9 दिसंबर ने चुनाव सुधारां माथे बहस व्हेला।

000

प्रधानमंत्री नरेन्द्र मोदी आज सशस्त्र सेना झंडा दिवस माथे कयो कि देश वां वीर पुरुषां अर महिलावां रे प्रति आपरी गहरी कृतज्ञता जतावे है, जका अटूट साहस रे साथे देश री रक्षा करे है। एक सोशल मीडिया पोस्ट मांय, श्री मोदी कयो के सैनिकां रो अनुशासन, दृढ़ संकल्प अर अदम्य साहस लोगां री रक्षा करे है अर राष्ट्र ने मजबूत बनावे है। वणां देशवासियां ने सशस्त्र सेना झंडा दिवस कोष मांय योगदान देवण खातिर भी प्रोत्साहित करयो। प्रमुख रक्षा अध्यक्ष जनरल अनिल चौहान आज सशस्त्र सेना झंडा दिवस माथे

सैनिकां, पैली वाळा सैनिकां अर वीर नारियां ने बधाई दी। श्री चौहान भारत री रक्षा तैयारियां अर राष्ट्रीय सुरक्षा मांय वां री दृढ सेवा, अदम्य साहस अर निरंतर योगदान री सराहवना करी।

वठीने राज्यपाल हरिभाऊ बागडे झंडा दिवस रे मौके माथे सगळा प्रदेशवासियां सूं सैनिकां अर वारे पिरवारां रे कल्याण खातिर अंशदान देणे री अरज करी। इण मौके माथे आज सैनिक कल्याण मंत्री कर्नल राज्यवर्धन सिंह राठौड लोक भवन पहुंचर राज्यपाल री जैकेट माथे प्रतीकात्मक रूप मांय झंडा लगाया। मुख्यमंत्री भजनलाल शर्मा आज जयपुर मांय सैनिकां रे सम्मान मांय राखीजी मैराथन ने रवाना करयो। इण मैराथनम मांय भारतीय सेना मांय कार्यरत धर्मेद्र पूनिया पैली जगह माथे आया। धर्मेद्र वर्तमान मांय पूणे आर्मी इंस्टीट्यूट मांय प्रशिक्षण ले रिया है। प्रदेश रा न्यारी-न्यारी जगावां माथे भी सशस्त्र सेना झण्डा दिवस रे मौके वीर जवानां ने याद करयो गयो। भरतपुर मांय इण मौके माथे रैली निकालीजी। इण रे साथे ही पैली वाळा सैनिकां अर वीरांगनावां ने सम्मानित करयो गयो।

000

राज्यपाल हरिभाऊ बागडे आज लोक भवन मांय 'भारत दर्शन अभियान' रे तैत कश्मीर सूं आया पढेसरिया रे दळ सूं मुलाकात करी। राज्यपाल इण रे चालता भारत भ्रमण सूं जुड़या आ पढेसरिया रा अनुभव सुण्या। वणां कयो के भारत दर्शन 'एक भारत श्रेष्ठ भारत' री संकल्पना सूं साक्षात होणो है।

000

पैलो प्रवासी राजस्थानी दिवस 10 दिसम्बर ने मनायो जावेला। जयपुर मांय इण दिन होवण वाळा जळसा खातिर करी जा रही व्यापक तैयारियां ने अंतिम रूप दियो जा रियो है। प्रदेश मांय निवेश ने बधावो देणे अर प्रवासी राजस्थानियां ने एक मंच माथे लाणे रे लगस सूं ओ आयोजन करयो जा रियो है। मुख्यमंत्री भजनलाल शर्मा आज एक वीडियो साझा करता व्हीया कयो के राजस्थान मांय निवेश री अपार संभावनावां है। ओ भव्य आयोजन प्रवासी राजस्थानियां री उपलब्धियां अर योगदान रो सम्मान करेला। इण रे साथे ही विकसित राजस्थान रे निर्माण मांय वांणी सक्रिय भागीदारी ने एक मौको भी देवेला।

000

प्रदेश मांय इंटर स्टेट टाइगर ट्रांसलोकेशन री प्रक्रिया जारी है। इण रे पैल्या चरण मांय मध्यप्रदेश रा पेंच टाइगर रिजर्व सूं बूंदी रा रामगढ़ टाइगर रिजर्व मांय बाघिन लाई जावेली। फिलहाल इण बाघिन रे खारित रामगढ़ टाइगर रिजर्व मांय एन्क्लोजर तैयार कर दियो गयो है।

लोकसभा अध्यक्ष अर कोटा-बूंदी खेतर रा सांसद ओम बिरला बाघां ने लावण माथे खुशी जताता थकां कयो कि इण सूं पर्यटन ने बधावो मिलेगा अर स्थानीय स्तर माथे रोजगार मांय बधोतरी व्हेला।

000

बारां जिला रा अंता विधानसभा खेतर मांय विशेष गहन पुनरीक्षण कार्यक्रम री काले सूं सरुआत व्ही। महात्मा गांधी राजकीय विद्यालय बामला मांय राखी ज्या स्वीप कार्यक्रम मांय युवावां ने मतदान रो मेहतव समझायो गयो अर दूजी जागरुकता गतिविधियां राखीजी। स्वीप कार्यक्रम रा सह-प्रभारी अमित भार्गव बतायो के 11 दिसंबर सूं 6 जनवरी ताई बीएलओ तीन बार घर-घर जाण एसआईआर गणना प्रपत्र भरवावेला। मतदातावां ने 2002 री मतदाता सूची रे आधार माथे जाणकारी तैयार राखणे, रंगीन फोटो मुहैया करणे रे

साथे-साथे ऑनलाइन अर ऑफलाइन फॉर्म भरणे री प्रक्रिया समझाईजी। कार्यक्रम मांय चुनाव सूं जुड़या अहलकार, कर्मचारी अर ग्रामीण मौजूद रिया।

000

सरकार विमानन कंपनी इंडिगो ने रद्द या बाधित उड़ानां खातिर यात्रियां रा सगळा लंबित रिफंड बिना किणी देरी रे जारी करणे रा हुकम दीया है। नागर विमानन मंत्रालय हुकम दियो है कि ऐड़ी सगळी उड़ानां खातिर रिफंड प्रक्रिया आज रात 8 बज्यां ताई पूरी हो जाणी चाहिजे। लारला कुछेक दिनां सूं इंडिगो री उड़ानां घणी तादाद मांय रद्द करया जाणे रे पाछे ओ हुकम जारी करयो गयो है। उड़ानां रद्द होणे से देशभर रा यात्रियां ने घणी परेशानी हो रही है।

000

रेलवे काले सूं आवता दो दिनां खातिर कई ज़ोन मांय नवासी खास रेलगाड़ियां चलाई हैं। सर्दियां रे मौसम मांय घणी तादाद मांय उड़ानां रद्द होणे अर बेसी भीड़ ने देखता थकां आं खास रेलगाड़ियां री घोषणा करी है। मध्य रेलवे मांय पुणे सूं बेंगलुरु, पुणे सूं दिल्ली अर मुंबई सूं दिल्ली समेत न्यारा-न्यारा गोला माथे 14 खास रेलगाड़ियां री घोषणा करीजी है।

000

सवाईमाधोपुर-करौली जिला दुग्ध उत्पादक सहकारी संघ लिमिटेड उपभोक्तावां ने राहत देणे अर पॉली पैक दूध री बिक्री बधाने खारित नुवी योजना सरू करी है। म्हाणा संवाददाता बतायो कि इण योजना रे तैत संघ, शादी-जळसा खातिर एडवांस बुकिंग करवाणे वाळा उपभोक्तावां खातिर किफायती दरां माथे दूध मुहैया करावेला।

000

प्रदेश मांय रात रे पारे मांय मामूली बधोतरी व्ही है। मौसम महकमे रे मुजब बीती रात भी सीकर रो फतेहपुर साढे तीन डिग्री सैलियस कमती तामपान रे साथे सबसूं सरद रियो। बीकानेर रे लूणकरणसर, चूरू, दौसा, करौली, सीकर अर अलवर मांय रात रो पारो 5 सूं 7 डिग्री सैलियस रे बीचे दरज व्हीयो। आज कई जगावां माथे बादल छायोडा रिया अर सुंवारे देर ताई कोहरे रो असर रियो। बधती सर्दी ने देखता व्हीया न्यारी-न्यारी जगावां माथे रैन बसेरां री व्यवस्था करी जा रही है। वठीने मौसमी बीमारियां सूं बचाव खातिर भी कई जतन कराय जा रिया है। इण रे साथे ही लोगां रे खाण-पाण मांय भी बदळाव व्हीयो है।

000

नवीन अर नवीकरणीय ऊर्जा मंत्रालय-एमएनआरई साफ कयो है के नुवा नवीकरणीय ऊर्जा वित्त पोषण ने रोकणे या बंद करणे खातिर कोई सलाह जारी नीं करीजी है। मंत्रालय बेसी खमता री चिंतावां रे बीचे ऋण प्रतिबंधां री खबरां रो खंडन करयो है। मंत्रालय रे मुजब वणां वित्तीय संस्थानां सूं नवीकरणीय ऊर्जा परियोजनावा या उपकरण निर्माण सुविधावां ने करजो देणो बंद करणे खातिर नीं कयो है। मंत्रालय पीएलआई योजना समेत लगेतार नीतिगत समर्थन रे माध्यम सूं वैश्विक सौर मूल्य श्रृंखला मांय भारत री स्थिति मजबूत करणे अर देश ने सौर विनिर्माण मांय आत्मनिर्भर बनाणे रे खातिर आपरी प्रतिबद्धता माथे जोर दियो। मंत्रालय 2030 ताई 500 गीगावाट गैर-जीवाश्म ईंधन लगस ने पूरो करणे खातिर सौर पारिस्थितिकी तंत्र रे समावेशी, प्रतिस्पर्धी अर सतत विकास खातिर प्रतिबद्ध है।

000